



21. august 2009

UKA 2009/139

Inatsisartut Suleriaasianni § 35 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Namminersorlutik inuutissarsiorniarlutik aallarteqqaat pillugit Akileraartarneq pillugu Isumalioqatigiissitap misissuisariaqarnera pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaak Akitsinnguaq Olsen, Inuit Ataqatigiit)

Tungavilersuut: Naalakkersuisut suleqatigiinnissamut isumaqatigiissutaanni naalakkersuisooqatigiit akileraarneq pillugu isumalioqatigiinnissaminnut imminnut pituttorput. Isumaqatigiissut naapertorlugu akileraarnermut isumalioqatigiissitami ingerlassat aalajangersimasut assigiinngitsut iluini akileraasariaatsit misissuiffigineqassapput, kiisalu inunnik isumaginninnikkut ineqarnikkullu tapiissutaasartut misissueqqissaarnikkut qulaajaneqassallutik. Taama pissusissamisoorlumik iliuseqarniarneq Inuit Ataqatigiit tungaanniit tamakkiisumik tapersorsorparput.

Matumuunali apeqquteqaat aallaavigalugu oqallinnissamut siunnersuuteqarnermi namminersorlutik ingerlatsisut aallarteqqaat, kiisalu suliffeqarfiit mikinerusut nutaaliortutik nerisassat tungaasigut tunisassiorliortutik ingerlatsisut akileraartarnikkut qanoq atugaqarneri qitiutikkusuppakka.

Isumaga naapertorlugu nunatsinni namminersorlutik ingerlatsiniartutik aallartittut periarfissaat, pitsaaliornissaminnullu periarfissaat pitsanngorsartuartaqarput. Inuutissarsiornikkut ineriartortitsineq avaqqullugu inuiaqatigiinni atugarissaarnerup ineriartortinnissaa akissaqartinneqarsinnaanngilaq.

Namminersorlutik inuutissarsiornikkut ingerlatserusuttut kisimik pimoorussivigineqartariaqarput – maannamummi takusareeqaarput pisortat (qinikkallu) inuutissarsiornermik ingerlatsinerlutik piukkunnarnerpaanngitsut. Inuutissarsiornikkut ineriartortitsinermi atukkat tamakkiisumik pitsanngorsarnerisigut namminersortut aamma nunatsinni inuiaqatigiit aningaasaqarnerannut annertunerusumik akuulersinnaapput, tamannalumi pissusissamisoorluinnassaaq.

Taamaammat akileraarneq pillugu isumalioqatigiissitaliap sulinerani namminersorluni inuutissarsiornermik ingerlatsinermi akileraartariaatsip pitsanngorsarneratigut aallarniinarneq periarfissineqarsinnaanersoq ilanngullugu misissukkanut ilaatittariaqarpoq. Ilaatigut eqqarsaatigineqarsinnaavoq suliffeqarfiit namminersortut nutaat aallartisarnerminni ukiuni pingasuni akileraartaratik ingerlasinnaanissaannut periarfissiineq.

Taamaaliortut ilaatigut suliffeqarfinnik nerisassanik nioqqutissiornermik aallartitserussuttoqalernissaa neriuutiginarpoq, kingunerissammagumi arlaleriaqaluni

naalakkersuinikkut kisaatigineqartarsimasoq, tassaasoq nerisassanik nioqqutissanik immitsinnut pilersorsinnaanerput. Nunaqarfimmiunut tunitsivinnik nammineerlutik suliffeqarfittut annertunerusumik ingerlatsilernissaannut kajumissaarutigineqarsinnaanera takorloorneqarsinnaavoq, taamaaliormi ullumikkut ingerlatsinermut sanilliullugu qularnanngitsumik eqaannerujussuarmik ingerlatsisoqarsinaalissamat. Aammattaaq ilinniagaqarsimasunut naammasserlaanut namminersorlutik suliffeqarfiliorusuttunut qularnanngitsumik kajumissaataasinnaassalluni.

Assersuutitut saqqummiussat immiini naammangillat, soorunalumi taakkuinnaanatik. Isumasioqatigiititaliap eqqarsaatersornerani ajornartorsitaasup anigorniarnernanut periarfissat siunnersuutillu allat ilaatittariaqarput. Isumasioqatigiissitaliattaami aaqqiiniarnernik siunnersuusiormermini ilanngullu aaqqissuussinerit atonerlunneqannginnissat misileraaffiunngissaallu qulakkeerniarlugu eqqarsaatersorluartariaqarpoq.

Inatsisartuni partiit matumani apeqquteqaat aallaavigalugu oqallinnermi isummanik arlaqarnerusunik oqaluuserisinnaatinnik saqqummiusserusunnissat qularinngilara.

Isummat saqqummiunneqartut sukumiisumik piviusorpalaartumillu oqaluuserinerini akileraarnermut isumasioqatigiissitaliap sulinissaanut aallaavissat iluaqutigisinnaasaallu pillugit Inatsisartut oqaaseqaatissamik isumaqatigiissuteqarsinnaanerat neriuutiginarpoq.